

ያኑሲ ማድ"ም ዳኪንቴ ጳውሎስ ላሞዓሲ ጊሞቴዎሴም ዳኬ ኪኢቶ" ዓይያ ካሮ"

ሓይ፥ ጳውሎስ ጊሞቴዎሴም ፃኣፔ ላሞዓሳ ኪኢታ"፡- ዒዛኮ ደማ" ማዓ፥ ዎላ" ማዳያ ማዓ፥ ዳጌሢ፥ ጊሞቴዎሴም ባሽ ዘር ዘራያኬ፥ ሚርጌና ዒ ዘራሢ' ጊቢ" ዳንዳዒሢ ዛላኬ፤ ጊሞቴዎሴ ዘራንቴሢ ዩሱስ ኪሪሰቶሴ ዛሎ" ጉሙርቁንቲ ማርካዳንዳጉዲ፥ ኪሪሰቶሴ ዛሎ" ኮዦ ሃይሶና ሚናኣ ጫኣቃሢ ማፃኣፓ ዔርዛ ባኮ ኮሺ" ደዲ ዒ ዓርቃንዳጉዲና ዎዚ ሜቶና ዒደንቲና ሚርጌቶዎ ያኑሲ ቃኣሎ" ዔርዚያና ኮዦ ሃይሶ ኬኤዚያ ማድ"ዎ ደዲ ማዳንዳጉዲኬ።

ጊሞቴዎሴም ባሽና ላቲ" ኬኤዚንቴ ባካ፥ ዔኤያቶና ፓሠዎ ማርሚሢናይዳፓ ሃካንዳጉዲኬ፤ ዓይጎር ጌዔቴ ዩያጉዳ ባኣዚ" ዎይዛ ዓሶ ባይዚሢዳፓ ዓታዛ ሜሌ" ማኣዳ" ባኣዚ" ባኣሴ።

ዩያ ቢያና ጊሞቴዎሴ ማላንዳያ ኮይሴሢ' ጳውሎሴኮ ናንጋ ዎማዲ ማዔቴያ፥ ጌይፃ፡- ዒዛኮ ያኑሲ ጉሙርቁያ፥ ጊቢ" ዳንዳዒያ፥ ናሹዎ፥ ደዲሞና ዒዲ ዳኪንቴያና ሃሣ ዒዛ ሄሌ" ሜታሢ ዒ ማላታ ማሢ ናንጋንዳጉዲኬ።

ማፃኣፔላ ዲማ ዲማ ዓርቄ ባኮ

- ዓይያ ካሮ" 1፥1-2
- ጳውሎስ ጋላቴ ጋላቶ"ና ዘሬ ዘሮ" 1፥3—2፥13
- ጊሞቴዎሴ ማዳንዳጉዲ ዓይሢንቴ ባኮና ላቲ" ኬኤዚንቴ ባኮ 2፥14—4፥5
- ጳውሎስ ዒ ዓኣ ጎይያ ኬኤዜሢ 4፥6-18
- ጋፒንሢ ሃይሴ 4፥19-22

1 ዩሱስ ኪሪሰቶሴና ጴጌ ናንጎኮ ሃጊ ማዓንዳ ዎዞ" ጎይያ ያኑሲ ማላሢና ዩሱስ ኪሪሰቶሴ ማድ"ም ዳኪንቴያ ማዓ፥ ጳውሎሴይዳፓ ዳኪንቴ ኪኢታ፡-

2 ታኣኒ ናሽካ ናዓሢ፥ ጊሞቴዎሴም፤

ያኑሲ፥ ዓዳሢና ኑ ጎዳሢ፥ ዩሱስ ኪሪሰቶሴኮ ኮሹዎ ዒንጊያና ማኣሪያና ሃሣ ዎዞ"ና ኔኤም ማያንጎ።

ጊሞቴዎሴም ዘርና ዘር

3 ቢያ ዎዳ ዋንቴና ርኦሪና ኔ ዛሎ" ማሊ ማሊ ታ ሺኢቃኣና ቤርታኣ፡ ታ ዓደንሣጉዲ ጌኤሺ ዒናፓ ታ ካኣሽካ ያኦዛሣ ታ ጋላታኔ። 4 ኔ ዩኤኪ ዓቢቴ ዓቢያ ታ ዋሊ"ባኣሴ፤ ዩያር ሚርጌና ዒና" ታኣኮ ዎዛዳንዳጉዲ ኔና ዛጋኒ ታ ኮዓኔ። 5 ኔኤኮ ዓኣ ጎኔ፡ ያኦሲ ጉሙርቂያ ታ ጳቂሣኔ፤ ዩያጉዴ ጉሙርቂያ ቤርታ ኔ ዓሆ ሎይዴይዳ ሃሣ ኔ ዒንዶ ዒዌንቄይዳ ዓኣያኮ፤ ሃሣ ኔኤኮ ዎ ዩያጉዲ ዓኣሣ ታ ዔሬኔ። 6 ዩያር ታ ኔ ዑፃ ኩጮ ጌሣም ኔ ዔኬ፡ ኔ ጊዳ" ዓኣ ያኦሲኮ ዒንጊያ ማዶይዳ ፔኤሺ" ኔ ዲቻንዳጉዲ ታ ኔኤም ከኤዛኔ። 7 ዓይጎር ጌዔቴ ያኦሲ ኦም ዒንጌሣ፣ ዎልቁንታ ናሹሞንታ ዒንጋያ፤ ሃሣ ኦና ኦ ዔሪ ዎይሣንዳ ዓያና ማዓንዳኣፓ ዓቴም ዒጊቹሞ ዓያናቴዎሴ።

8 ዓካሪ ኦ ጎዳሣ ዛሎ" ዓሶም ማርካዳኒ ሴልቂፖ፤ ሃሣ ዒዛ ዛሎ"ሮ ቱኡቴ፡ ታ ዛሎ"ሮዎ ሴልቂፖ፤ ያኦሲ ኔኤም ዒንጋ ዎልቆና ኮኸ ሃይሶ ዛሎ"ሮ ታኣና ዎላ" ሜታዳ። 9 ዒዚ ኦኡኒ ማዴ ኮኸ ማዶሮቴዎንቴ ፔ ማሊያና ፔኤኮ ኮሹሞ ዒንጊያና ዳቂሺ፡ ያኦሲም ዲማዴያ ማዒ ናንጋንዳጉዲ ኦና ዔኤሌ"ኔ፤ ዩያ ኮሹሞ ዒንጊያ ሚርጌ ዎዴኮ ቤርታ ዩሱሰ ኪሪሰቶሴ ዛሎ"ና ኦም ዒንጌኔ። 10 ዩይ ያኦሲኮ ኮሹሞ ዒንጊያ ኦና ዳቂሺ፡ ዩሱሰ ኪሪሰቶኮ ሙኪያና ሃሣ ፔጋዲ ዔርቴኔ። ዒዚ ሃይቢኮ ዎልቁ ባይዚ ኮኸ ሃይሶ ዛሎ"ና ሃይቢባኣ፡ ናንጊና ናንጊ ኦም ዳቂኔ።

11 ታኣኒያ ዩያ ኮኸ ሃይሶ ከኤዛያ፤ ዩያ ማዶ"ም ዳከንቴያ ሃሣ ዔርዛያ ማዒ ዶኦሪንቴኔ። 12 ሓያ ታ ሜታሣ ዔካሣ ዩያርኬ፤ ጋዓንቴ ታኣኒ ሃያ ሜቶ ዔኪያና ሴልቂዎሴ፤ ዓይጎር ጌዔቴ ያና ጉሙርቃቴያ ታ ዔራኔ፤ ታ ዒዛም ሃዳርሲ ዒንጌ ባኮ ዩኖ ከሎ" ሄላ"ንዳኣና ዒ ካፓኒ ዳንዳዓሣ ታ ጉሙርቃኔ። 13 ታ ጊዳ"ፓ ኔ ዎይዚ ዔሬ ቃኣሎ" ማላታ ማሂ ዩሱሰ ኪሪሰቶሴና ኦኡኮ ዓኣ ፔቴሞ ዛሎ"ና ጳዳ ጉሙርቂያና ኮሹሞና ዶዲሺ ዓርቁ። 14 ኦ ጊዳ" ዓኣ ዓያኖ ጌኤኸ ዛሎ"ና ኔና ጉሙርቂ ኔኤም ዒንጊንቴ ባኮ ካፔ።

15 ዒሲያይዳ ዓኣ ዓሳ ቢያ ታና ሃሹ"ሣ ኔ ዔራኔ፤ ዔያቶ ባኣካ" ፔጌሎሴና ሄርሞጌኔሴና ዓኣኔ። 16 ጎዳ፡ ያኔሰፖሪ ማኣር ዓሶ ማኣዶ"ንጎ፤ ዓይጎር ጌዔቴ ዔያታ ሚርጌ ዎዴ ታና ያኦጪ ዶዲሹኔ፤ ሃሣ ታ ቱኪ"ንቴሣር ሙኪ ታና ያኦጪያዎ ሴልቂ ሃሺ"ባኣሴ። 17 ዒዚ ሮሜ ዓጮ" ሙካዎ ሚርጌና ኮይ ታና ዴንቄኔ፤ 18 ጋፒንዎ ከሎ"ና ጎዳ ዒዛም ኮሺ ማዶንጎ፤ ቤርታ ታ ዔፕሶኔይዳ ዓኣና ዒ ዎማይዲ ታኣም ማዶቴያ ኔ ኮሺ" ዔራኔ።

1:5 ዳኪ ማዶ" 16:1። 1:11 1ጊሞ. 2:7።

2

ኪሪሰቶስ ማደ" ዛሎ" ያልታ ዓሲ ማዒሢ

1 ባካሪ ታ ናዒሢዮ! ዩሱስ ኪሪሰቶስ ዛሎ"ና ጴዳ ኮሹዋ ዒንጊዮና ደዴ። 2 ሚርጌ ማርካ ማዓ ዓሶ ቤርታ ታጊዳፓ ኔ ዋይዚ፥ ዔሬ ዔራቶ" ሜሌ" ዓሲ ዔርዛኒ ዳንዳዓያ፤ ሃሣ ጉሙርቁንታ ዓሲም ሃዳርሲ ዒንጌ።

3 ኔኔኒ ዩሱስ ኪሪሰቶስኮ ማደ" ዛሎ" ያልታ ጉሙርቁንታ ዓሲ ማዒ፥ ሜታሢ ኑኡና ዋላ" ጊቢ" ዳንዳዔ። 4 ፖኑሊሴ ማዔ ዓሲ' ፖኑሊሶ ዓይሣሢ ዋዛሳያ ማዓኒ ጊኢጌያ ማዓንዳኢፓዓቴም ፖኑሊሴም ኮይሱዋ ባኣዚ"ዳ ጌሉዋሴ። 5 ዩያጉዲ ሃሣ ጳሺ ጳሽካ ዓሲ ዓይሢንታ ጎይያማ ጳሽኪባኣያታቴ ጳዠና ባሺ ዳንቆ ባኮ ዔኩዋሴ። 6 ደዲ ጎሽካ ዓሢ' ሃኣኮ ካዒሲ ሙዓ ዓሶይዳፓ ቤርታዳሢ ማዓንዳያ ኮይሳኔ። 7 ጎዳሢ ቢያ ባኣዚ"ና ጳቂሥሢ ማላሢ ኔኤም ዒንጋንዳሢፓ ታ ኔኤም ጋዓ ባኮ ቢያ ዒና ዔኩ።

8 ሐይባ"ፓ ዔቆሢ፤ ሃሣ ዳውቴ ዜርፃሢ ማዔ፥ ዩሱስ ኪሪሰቶስ ማሌ፤ ታኣኒ ኬኤዛ ኮዠ ሃይሳ ዩያኬ። 9 ዩያ ኮዠ ሃይሶ ኬኤዚያ ዛሎ"ና ፑርቴሴ ዓሲጉዲ ቴኡቴ ሜቶ ታ ሃሢ ዔካኔ፤ ያኦሲኮ ቃኣላ" ጋዓንቴ ቴኡቴዋሴ። 10 ዩያር ዔያታ ዩሱስ ኪሪሰቶስ ዛሎ"ና ጴዳ ዳቁንቶና ናንጊና ናንጋ ቦንቾ ዳንቃንዳጉዲ ሃሣ ያኦሲ ደኦሬ ዓሶር ጌዒ ቢያ ባኣዚ" ታ ዳንዳዓኔ።

11 «ዒዛና ዋላ" ኑ ሃይቁቶ

ዒዛና ናንጊና ኑ ናንጋንዳኔ።

12 ጊቢ" ዳንዳዒሢና ደዴያ ኑ ማዔቴ

ዒዛና ዋላ" ኑ ካኣታዳንዳኔ።

ዒዛ ኑ <ዔሩዋሴ> ጌዔቴ ዒዚያ ኑና <ዔሩዋሴ> ጋዓንዳኔ።

13 ኑኡኒ ጉሙርቁንቱዋያ ማዔቴ

ዒዚ ፔና <ዔሩዋሴ> ጋዓኒ ዳንዳዐ-ዋኣሢፓ ጉሙርቁንታያ ማዒ ናንጋንዳኔ»

ጋዓ ቃኣላ" ጎናዲ ዔርቴያኬ።

ያኦሲ ባኣዚ" ደዲ ማዳ ዓሲ

14 ሐያ ባኮ ዔያቶም ኮሺ" ኬኤዜ፤ ዩይያ፡- ጌይንቴ ባኣዚ"ዳ ዔያታ ማርሚ ሺሩዋጉዲ ያኦሲ ማርካ ማሢ ዔያቶም ላቴ" ኬኤዜ፤ ዓይጎር ጌዔቴ ዩይ ማርማሢ ዋይዛ ዓሶ ባባይዛፓዓቴም ዓይጎዋ ማኣዲ"ዋሴ። 15 ጎኔ ያኦሲ ቃኣሎ" ፒዜ ዔርዛያ፥ ማዳ ማደ"ናኣ ቦርሲንቱዋ ዓሲ፤ ሃሣ ዔርቴ ማዳ ዓሲ ማዒ ኔና ያኦሲ ቤርቶ

2:12 ማቴ. 10:33፤ ሉቃ. 12:9፤ ፓይ. ማፃ 16:5።

ሸእሻኒ ደዴ። 16 ሓያ ዓጮ" ባአዚ" ማዔያ፡ ሃሣ ጉሪ ጌስቲ ሸሮ ጌኤዛፓ ሃኬ፤ ዓይጎር ጌዔቲ ዬያጉዴ ሃይሳ ዓሲ ያኦሲዳፓ ሃከሳሣርኬ። 17 ዔያቶኮ ጌኤዛ ፓፁዋ ከሣጉዲ ያየርሳታያኬ፤ ዔያቶ ባአካ" ሄሚኔዎሴና ፒሊያሴና ዓአኔ። 18 ዬንሣሂ ዓሳ፡ «ሐይቄ ዓሶኮ ሃይባ"ፓ ዔቂፃ ቤርታ ማዔ.ጋፔኔ» ጌይ ጌይ ማርሚሢና ጎኩሞ ጎይፃፓ ዳቢንቲ ኬሰከ. ፔቲ" ፔቲ" ዓሶኮዋ ጉሙርቂፆ ዣአሊሳኔ። 19 ያዒ ማዔቲያ፡ «ጎዳ ፔኤም ማዔዞንሣሂ ዔራኔ» ዬያጉዲ ሃሣ፡ «ጎዳ ማአድ"ሞ ዔኤላ" ዓሲ ቢያ ፑርታ ባአዚ"ዳፓ ሃኮንጎ» ጋዓ ማላታ ዓይሣንቲ ዓአ፡ ዓጊፁዋ ያኦሲ ዔቂሴ ቦኦኮላሣ ዔቂ ዓአ ጎይሣኬ።

20 ፔቲ" ዴኤፒ ማአሪዳ ዎርቄና ቢራ ዓንጊናይዳፓ ኮሺ"ንቲ ሜሄ ሌሊ ዓአያቱዋንቲ ሚሢና ዓጨናይዳፓ ኮሺ"ንቲ ሜሄያ ዓአኔ። ዬያቶይዳፓ ዛላ" ቦንቸንታ ማዶም ማዓያ፤ ዛላ" ጊንሣ ዳካ" ማዶም ከይሳያኬ። 21 ዓካሪ ያኦኒያ ፔ ቶኦኮ" ዬንሣሂ ፑርቶ ባኮንሣዳፓ ጌኤሺ" ካፔቶ ቦንቸ ማዶ"ም ማዔያ፡ ያኦሲም ዲማዴያ፡ ፔ ጎዳሣማአ ከይሳያ ሃሣ ኮሺ ማዶም ቢያ ጊአጌ ሜሄ ማዓንዳኔ።

22 ፑርታ ማዔ፡ ዴጋቶ ሱኩኬይዳፓ ሃኬ፤ ጌኤሺ ዒኔና ጎዳ ካአሽካ ዓሶና ዎላ" ማዔ. ያሉ"ሞ፡ ያኦሲ ጉሙርቂሢ፡ ናሹሞንታ ኮሹሞንታ ዓአያ ማዔ ናንጌ። 23 ዑራ ማከሣሂ ዔሪ ዔኤያቶ" ጌኤዘና ፓሡዋ ማርሚሢና ሃሹ"። 24 ጎዳ ዬሱሴም ማዶ ዓሲ፡- ቢያ ዓሲም ሸሌዔ፡ ዓሲ ዔርዘኒ ዳንዳዓያ ሃሣ ዔኤቢ ጊቢ" ዳንዳዓያ ማዓንዳአፓዓቲም ዑዑራዳንዳያ ኮይሱዎሴ፤ 25 ጎኩሞ ዔያታ ዔራንዳጉዲ ያኦሲ ዔያቶም ጎሞ ጎያንቲ ዓቶም ጋዓንዳያ ናንዳኔ ጌዒ ዒዛ ዒፃ ፑርቶ ዓሶ ሸሌዑሞና ፒዚሳያ ማዓኒ ከይሳኔ። 26 ዬያይዴቲ ዔያቶኮ ዒና" ማዔም፡ ያላሄ ፔ ማሊያ ዔያታ ከንሣንዳጉዲ ዔያቶ ዓይሣ ፒራሣዳፓ ዔያታ ቶላ"ንዳኔ።

3

ጋፒንፃ ዎድ"ና ማዓንዳ ፑርቶ ባኮ

1 ጋፒንፃ ዑካአና ሜታሳ ዎዴ ዬዓንዳሣ ዔሬ፤ 2 ዓሲ ፔና ናሽካያ፡ ሚኤሸሮ ጎጋይቃያ፡ ሄርሸንታያ፡ ያቶርቃያ፡ ጫሽከንታያ፡ ሾዔ ዓሶም ዓይሣንቲዎያ ኮሺ ማዶና ዛላም ማሂ ማሉዎያ፡ ጌኤሹሞባአ ዓሲ፡ 3 ናሹሞባአ ዓሲ፡ ዓሲና ዎላ" ጌኤጋኒ ኮዑዎ ዓሲ፡ ዓሲ ዳንካያ፡ ፔና ዔሪ ዎይሡዎያ፡ ዓሲ ሚጨንቲዎያ፡ ኮሺ ማዔ ባአዚ" ቢያ ዒፃያ፡ 4 ጉሙርቂንቲዎ ዓሲ፡ ዔኤቢ ዔሩዎያ ሩኡራያ፡ ጉሪ ሆኦሊ"ንታያ፡ ያኦሲዳፓ ባሽ ፔኤም ኮሽካ ባአዚ"

ናሽካያ ማዕንዳኔ። 5 ጾኑሲ ጎኔ ካኣሽካያ ማላዎ ጎኔ ካኣዠኮ ዎልቆ ጉሙርቁዎያ ማዕንዳኔ፤ ዩያጉዳ ዓሶፓ ሃኬ። 6 ዩያጉ ዓሳ ዓሲኮ ማኣሪ ዔርቱዎ ጎይሢና ጌሊ ጌሊ ሚርጌ ጎሜ ማዳያ ሃሣ ዲማ ዲማ ፑርታ ሱኡኬና ናንጋ፣ ዓያና ላቤ" ላኣሎ ደቢሻ ዓሶኬ፤ 7 ዩያጉዳ ላኣሎ ቢያ ዎዴ ዔርዘኔ፤ ጋዓንቴ ጎኑሞ ዔያጉ ዔራኒ ማሊ ዳንዳዑዎያኬ። 8 ዒያኔሴና ዒያምቤሬሴ ጎዎዘንሢ ሙሴ ዒዲ ማኬሢ ጎይያ ዩንሢ ዓሳ ማሊፃ ዔያቶኮ ፑርቱያ ሃሣ ጾኑሲ ጉሙርቁዎ ዛሎ"ና ደቢንቴያ ማዔሢር ጎኑሞ ዔያጉ ዒዲ ማካኔ። 9 ዒያኔሴና ዒያምቤሬሴናኮ ዔኤያጉ ፔጋዲ ዔርቱሢጉዲ ዩንሢ ዓሶኮዎ ዔኤያጉ ዓሲ ቢያ ቤርታ ፔጋዲ ዔርታንዳሢር ዔያቶም ጌኢጋዓኬ።

ጳውሎሴ ጊዋቴዎሴም ላቲ" ኬኤዜ ባኮ

10 ኔኤኒ ጋዓንቴ ታኣኮ ዔርዘያ፣ ታ ናንጌ ናንጎ፣ ታ ማላ ማሊያ፣ ጾኑሲ ጉሙርቁዎ፣ ጌቢ" ዳንዳዒያ፣ ናሹሞና ደዲሞና ዘገ ዔሬኔ፤ 11 ዩያጉዲ ሃሣ ዒዲንቴ ታ ዳውሲንቴ ዎደ"ና ታኣና ዎላ" ሜታሢያ ኔ ዔኬኔ፤ ዓንፀቢያና ዒቆኒዮና ሊሰዲራናይዳ ታና ሄሌ" ባኮና ጌቢ" ታ ዓኣሢ ዳውሲንቴያ ኔ ዔራኔ፤ ጎዳ ጋዓንቴ ዩያ ቢያይዳፓ ታና ዳቂሼኔ። 12 ዩሱሰ ኪሪሰቶሴ ጊንፃ ሃንታያ ማዒ ዓያና ናንገ ናንጋኒ ኮዓዘንሢ ቢያ ዒዲንቴ ዳውሲንታኔ። 13 ፑርቶ ዓሶና ጌሻ ዓሶና ጋዓንቴ ዓሲ ደቢሺ ደቢሺ፣ ሃሣ ፔ ቶኣኮ"ዎ ደቢንቴ ፑርቱዎይዳ ፑርቱሞ ቃሲ" ቃሲ" ዳንዳኔ። 14 ኔኤኒ ጋዓንቴ ዎይዜሢና ዔሬ ጎኑሞና ዶዴ፤ ዓይጎር ጌዔቴ ኔኤኒ ዩያ ፃ ጌዳ"ፓ ዔኬቴያ ዔራሢርኬ። 15 ጌኤዠ ማፃኣፖ ናኣቶፓ ዓርቂ ኔ ዔሬኔ፤ ዩንሢ ጌኤዠ ማፃኣፖንሢ፡- ዩሱሰ ኪሪሰቶሴ ጉሙርቁዎና ጴዳ፣ ዳቂንታ ባንሢ ሄሊ"ሳኒ ዳንዳዒ ዔራቶ ዓኣዘንሢኬ። 16 ጌኤዠ ማፃኣፓ ቢያ ጾኑሲ ዓያና ማሊሴም ፃኣፒንቴያኬ፤ ዩይያ፡- ጎኑሞ ዔርዘኒ፣ ደቢንቴ ዓሶ ዘራኒ፣ ደቢንቶዎ ጌኢጊሻኒና ፒዜ ናንገም ኮይሳ ማሊሢ ዒንጋኒ ማኣዳ"ያኬ። 17 ማኣዳ" ጎይፃ" ጾኑሲ ዓሲ ኮሺ ማዳም ቢያ ጌዳያ ማዒ ጴዳንዳጉዲ ማሃዎናኬ።

4

1 ጾኑሲ ሃሣ ሸምፖና ዓኣ ዓሶና ሃይቁ ዓሶና ዑፃ ዎጋኒ፣ ካኣቲ ማዒያ ዎይሢ ሙኪ ጴዳንዳ ዩሱሰ ኪሪሰቶሴ ማርካ ማሂ ታ ኔና ሸኢቃኔ፤ 2 ጾኑሲ ቃኣሎ" ኬኤዜ፤ ጌኢጌቴያ ጌኢጊባኣቴያ ደዲ ማዳ፤ ዓሶም ኬኤዚ ኬኤዚ ሃሣ ጎሪ" ጎሪ"፣ ዘሪ ዘሪ፣ ጌቢ" ዳንዳዒሢና

3:8 ኬሲ. ማፃ 7፣11። 3:11 ዳኪ. ማዳ" 13፣14-52፤ 14፣1-7፤ 14፣8-20።

ዬያጉዲ ቃኣሎ" ዔርዚሢናኣ ደዴ። 3 ዓይጎር ጌዔቴ ዓሳ ያኦሲ ቃኣሎ" ዋይዚ ዔካኒ ኮዑዋ ዋዴ ሙካንዳሢርኬ፤ ጋዓንቴ ዓሳ ዔያቶ ናሻ" ሓይሴ፣ ሃሣ ዔያታ ዋይዚ ኮዓ ሃይሶ ኬኤዘንዳ ፔኤኮ ዔርዘ ዓሲ ቡኩሳንዳ። 4 ዔያታ ጎኔ ባኣዚ" ዋይዚያ ዒዲ፣ ጉሪ ሃይሴ ዋይዚሢ ናሽካንዳ። 5 ኔኤኒ ጋዓንቴ ቢያ ባኣዚ" ዔሪ ካፒንቴ ናንጌ፤ ኔ ጊዳ" ሙካ ሜቶዋ ጊቢ" ዳንዳዔ፤ ሃሣ ኮዥ ሃይሶ ኬኤዚያ ማድ"ዋ ደዲ ማዴ፤ ያኦሲም ኔ ማዳ ዓሲ ማዔ ጎይዖና ኔ ማዳኒ ኮይሳ ባኮ ቢያ ማዲ ኩንሣ።

6 ታኣኒ ጋዓንቴ ያኦሲም ዒንጎ ባኣዚ" ማዒ ዒንጊንታኒ ዑኬኔ፤ ሃያ ዓጮ"ይዳፓ ደማዲ ታ ዓኣዳንዳ ዋዳ" ሄሌ"ኔ፤ 7 ያኦሲ ጉሙርቁያ ዘሎ"ና ዓኣ ያሎ ሚርጌና ታ ያልቴኔ፤ ጳዥዋ ጋፒንያ ሄላ"ንዳኣና ታ ጳሽኬኔ፤ ሃሣ ያኦሲ ጉሙርቁያ ካኣዥዋ ታ ካፔኔ። 8 ዓካሪ ሂሎ" ማዒ ናንጌሢር ዒንጊንታ ካኣቶ"ኮ ቶኦካ" ዓጎሢጉዴ ቦንቾ ባካ ታኣም ጊኢጊንቴ ታና ካፓንዳ፤ ዬያ ባኮ፡ ፒዜ ዋጋያ ማዔ ጎዳሢ ዬኖ ኬሎ"ና ታኣም ዒንጋንዳ፤ ዬይ ታኣም ሌሊቱዋንቴ ዒዛኮ ሙኪ ጴዲያ ጳቂሢ ካፓዞንሢም ቢያ ዒንጊንታንዳ።

ጳውሎሴ ፔ ዘሎ" ጊዋቴዎሴም ኬኤዜሢ

9 ኔ ታ ኮይላ" ዑኬ ሙኬቴ ቃራኬ፤ 10 ዴማሴ ሃያ ዓጮ" ናንጎ ናሽኪ፣ ታና ሃሺ"፣ ቴሰሎንቄ ዓኣዴ። ታ ኮይላ"ፓ ቁርቁሴ ጋላቴያ፤ ሃሣ ቲቶ ዲልማዲያ ዓኣዴ። 11 ታ ኮይላ" ሃሢ ዓኣሢ ሉቃሴ ሌሊኬ። ማርቆሴ ማድ"ዎ ታኣም ኮይሳያታሢር ኔኤና ዋላ" ዒዛ ዔኪ ሙኬ። 12 ቲኪቆሴ፡ ዔፕሶኔ ታ ዳኬኔ። 13 ኔኤኒ ሙካዖ ሂሮዓዳይዳ ካርፑሴ ጎያሢ ኮይላ" ታ ሃሺ" ዓኣዴ ታኣኮ ዴኤፖ ኮኣቶና ማሪንቴ ማፃኣፖዋ ባሽ ቢራኖ ማፃኣፖ * ዋሎ"ዋዖ ዔኪ ሙኬ።

14 ዒሰከንዲሮሴ ጎዖ ጊታሢ ፑርታ ማድ ታኣም ማዴ፤ ጎዳ ዒ ማዴ ማድ"ጉዴያ ዒዛም ዒንጋንዳ። 15 ዒዚ ኑ ኬኤዛ ኮዥ ሃይሶ ዒዲ፣ ማኬሢር ኔኤኒ ዒዛ ዔሪ ካፒንቴ።

4:10 ቆላ. 4፡14፤ ፒልሞ. 24፤ 2ቆር. 8፡23፤ ጋላ. 2፡3፤ ቲቶ 1፡4። **4:11** ቆላ. 4፡14፤ ፒልሞ. 24፤ ዳኪ. ማድ" 12፡12፤ 25፤ 13፡13፤ 15፡37-39፤ ቆላ. 4፡10።

4:12 ዳኪ. ማድ" 20፡4፤ ዔፕ. 6፡21-22፤ ቆላ. 4፡7-8። * **4:13** ማሪንቴ ማፃኣፖና ቢራኖ ማፃኣፖ፡- ጋዓሢ ዬኖ ዋድ"ና ማፃኣፓ ፃኣፒንታሢ ዬኖ ባኮይዳኬ፤ ማሪንቴ ማፃኣፓ «ፓፕራሴ» ጎዖ ሚያኮ ቁኤሪፓ ኮሾ"ያ ማዓዛ ቢራና ጌይንታሢ ዒልዳዳፓ ኮሾ"ያኬ።

4:13 ዳኪ. ማድ" 20፡6። **4:14** 1፤ዋ. 1፡20፤ ዓይኑ. 62፡12፤ ሮሜ 2፡6።

16 ታና ዎጌና ዓርቂሴ ባኮሮ ቤርታሲ ጌኤዞ ማሂያ ኬኤዛኒ ታ ሺኢኬ ዎድ"ና ቢያህሂ ታ ጌዳ"ፓ ዲማዴያፓ ዓቴሞ ያኢኒያ ታኣና ዎላ" ማዒ ታና ማኣዴ" ዓሲ ባኣሴ። ዬያ ያኦሲ ዒያቶኮ ዳቢንቲ ማሂ ዓርቆፓ። 17 ጋዓንቴ ኮኸፍ ሓይሳ ታ ዛሎ"ና ጉቤ ኬኤዚንታንዳጉዲና ዓይሁዴ ማዒባኣ ዓሳ ዎይዛንዳጉዲ ጎዳ ታኣና ዎላ" ማዒ ታና ደዲሼኔ፤ ሃሃ ዘቦ" ዳንጋፓኣ ታና ዳቂሼኔ። 18 ጎዳ ዓይጎዎ ማዎም ፑርታ ባኣዚ"ዳፓ ቢያ ታና ዳቂሻንዳኔ፤ ጫሪንጫ ዓኣ ዒዛኮ ካኣቱሞይዳኣ ታና ዒ ጌልዛንዳኔ፤ ዒዛም ናንጊና ቦንቾ ማዎንጎ፤ ዓኣሜን።

ጋፒንህሂ ሳራሥህሂ

19 ጲሪሰቂላና ዓቂላናም፤ ሃሃ ያኔሰፖሬ ማኣሮ ዓሶም «ኮሺዳ?» ጌዔኔ፤ ጌዔ። 20 ዔራሰያሴ ቆሮንቶሴይዳ ዓቴ"ኔ፤ ጂሮፒሞሴ ሓርጊንቴህሂሮ ሚሊዲዳ ታ ዒዛ ሃሺ"ኔ። 21 ባርጎ ዎዳ" ሄሉ"ዎንቴ ታ ኮይላ" ኔ ሙኬቴ ቃራኬ።

ዔውቡሉሴ፣ ጲዴሴ፣ ሊኖሴ፣ ቂላውዲያና ሃሃ ኪሪሰቶሴ ጉሙርቃ ዓሳ ቢያ «ኮሺዳ?» ኔና ጋዓኔ።

22 ጎዳ ኔኤና ዎላ" ማዎንጎ፤ ያኦሲኮ ኮሹሞ ዒንጊፃ ኔኤም ማዎንጎ።

4:19 ዳኪ. ማዶ" 18፥2፤ 2፻፵. 1፥16-17። 4:20 ዳኪ. ማዶ" 19፥22፤ ሮሜ 16፥23፤ ዳኪ. ማዶ" 20፥4፤ 21፥29።

ጌጌዥ ማግኔግ
The Holy Bible in the Maale language of Ethiopia,
using Ethiopic script

copyright © 2015 The Word for the World International and The Bible Society of Ethiopia

Language: Maale

Translation by: The Word for the World

Contributor: Bible Society of Ethiopia

Maale New Testament

by Bible Society of Ethiopia.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-12-29

PDF generated using Haiola and XeLaTeX on 11 Nov 2022 from source files dated 29 Jan 2022

bbcfb90a-3ae3-5452-983d-6c4c02375929